

RREGULLORE E PROCEDURAVE TE TRANSFERIMIT TE ASETEVE NGA TË LICENSUARIT.

PJESA E PARË

DISPOZITA TË PËRGJITHSHME

Neni 1

Autoriteti

Kjo rregullore hartohet në zbatim të nenit 20, të Ligjit nr.9072, datë 22.05.2003 “Për Sektorin e Energjisë Elektrike”, dhe në zbatim të vendimeve të Bordit të Komisionerëve të ERE-s për miratimin e licensave në sektorin e energjisë elektrike dhe në përputhje me Rregullat e Praktikës dhe Procedurave të ERE-s

Neni 2

Qëllimi

Qëllimi i kësaj rregulloreje është të sigurojë një trajtim të barabartë e transparent, për të gjithë të licencuarit në sektorin e energjisë elektrike, në aktivitetin e prodhimit, transmetimit dhe shpërndarjes së energjisë elektrike, të cilët paraqesin në ERE kërkesën për shitje, dhënie me qera, transferim apo ndryshime të tjera të çdo asetit ose të pronësive të përcaktuara për prodhim, transmetim, shpërndarje të energjisë elektrike.

Neni 3

Objekti

Kjo rregullore përcakton procedurat që aplikohen nga ERE si dhe parimet për shqyrtimin e çdo kërkesë për shitje, dhënie me qera, transferim apo ndryshime të tjera të çdo asetit ose të pronësive të përcaktuara për prodhim, transmetim, shpërndarje të energjisë elektrike sipas Ligjit nr.9072, datë 22.05.2003 “Për Sektorin e Energjisë Elektrike”.

Neni 4

Zbatimi

1. Kjo rregullore do të zbatohet për të gjithë të licensuarit në sektorin e energjisë elektrike të cilët kërkojnë të transferojnë asetet e prodhimit transmetimit , ose shpërndarjes sipas përcaktimeve të ligjit.
2. Për të licensuarit në aktivitetin e prodhimit do të kërkojë miratimi i ERE-s për transferim asetesh për kapacitet të instaluar më të madh se 500 kw. Për të gjithë të licensuarit e tjerë do të kërkojë miratimi i ERE-s për transferim të aseteve kur vlera e asetit që kërkojë të transferohet është më e madhe se 5.000.000 leke.
3. Për transferimin e aseteve që realizohet në kuadër të procesit të privatizimeve në sektorin publik nuk do të aplikohet kjo rregullore.
4. Kërkesa për transferim biznesi nga të licensuarit do të rregullohen sipas procedurave të përcaktuara nga ERE në Rregulloren për procedurat e licensimit.

Neni 5

Përkufizime

Fjalët dhe frazat e mëposhtme të përdorura në këtë Rregullore do të kenë kuptimet e mëposhtme:

1. “Ligj” do të thotë Ligji nr.9072, datë 22.05.2003 “Për Sektorin e Energjisë Elektrike” me të gjitha ndryshimet.
2. “Bordi i Komisionerëve” do të thotë organi vendimarrës i ERE-s, i përbërë nga pesë anëtarë të emëruar sipas procedurave të parashikuara nga Ligji nr.9072, datë 22.05.2003 “Për Sektorin e Energjisë Elektrike” dhe Ligji nr.9512, datë 10.04.2006 “Për disa ndryshime dhe shtesa në ligjin nr.9072, datë 22.05.2003 “Për Sektorin e Energjisë Elektrike”
3. “ERE” do të thotë Enti Rregullator i Sektorit të Energjisë Elektrike
4. Liçensë do të thotë një autorizim që i jepet një personi sipas Pjesës së Tretë të Ligjit nr.9072, datë 22.05.2003 “Për Sektorin e Energjisë Elektrike”
5. I liçensuar do të thotë një person që mban një liçensë të dhënë sipas Pjesës së Tretë të Ligjit nr.9072, datë 22.05.2003 “Për Sektorin e Energjisë Elektrike”

6. Proçedurë do të thotë tërësia e veprimeve, që kryhen për zbatimin e legjislacionit në fuqi.
7. Aset do të thotë aktivi afatgjatë material që trajtohet nga i licensuari dhe që i shërben realizimit të një nga aktivitetet e prodhimit, shpërndarjes dhe transmetimit.
8. Transferim asetesh do të thotë cdo veprim me anë të cilët krijohet një marrëdhënie qeraje, shitje, dhënie, peng apo ndryshimi tjerë të aseteve që i shërbejnë veprimtarisë së licensuar.
9. Biznes do të thotë aktiviteti i licensuar nga ERE për prodhimin, transmetimin dhe shpërndarjen e energjisë elektrike.

PJESA E DYTË

PROÇEDURAT E PARAQITJES SË NJË KËRKESË PËR TRANSFERIM ASETESH

Neni 6

Propozimi për fillimin e një proçedure për transferim asetesh

Një proçedurë për transferim asetesh fillon me paraqitjen nga një person mbajtës i një license të dhënë nga ERE të një kërkesë për shitje, dhënie me qera, peng, transferim apo ndryshime të tjera të çdo aseti që i shërbejnë veprimtarisë së licensuar.

Neni 7

Përmbajta e kërkesës për transferim

1. Çdo i licensuar që paraqet në ERE kërkesën për transferim asetesh duhet të përfshijë në kërkesën e tij në mënyrën dhe formën e kërkuar nga kjo rregullore, informacionin si më poshtë:

1. Emrin e plote të licensuarit
2. Adresën e saktë të licensuarit apo e personit të autorizuar për të ndjekur këtë procedurë në ERE ku të përfshihet edhe numri i telefonit, fax dhe adresa e postës elektronike nëse ka
3. Një përshkrim i të licensuarit që përmban informacion mbi:
 - a. të gjitha bizneset e të licensuarit
 - b. veprimtarinë e licensuarit
 - c. gjendjen financiare të kompanisë në kohën që paraqet kërkesën dhe efektin e pritshëm pas miratimit të transferimit të asetëve
 - d. një përshkrim të kandidatit të propozuar për transferim asetesh që përfshin informacion të përgjithshëm mbi veprimtarinë e shoqërisë që përfshihet në transaksion të tre viteve të fundit dhe të vitit të fundit kur shoqëria ka më pak se 3 vjet që është krijuar, gjendjen financiare
 - e. arsyet e kërkesës për kryerjen e transferimit
 - f. efektet e pritshme të transferimit në aktivitetin e të licensuarit
 - g. efekti në furnizimin e rregullt e të qëndrueshëm të klientëve të të licensuarit dhe në tarifat e aktivitetit të licensuarit.
 - h. Marrëveshje paraprake midis palëve për transferimin e asetëve.

2. Kërkesat e nenit 7, gërmat a dhe c, përbëjnë detyrim edhe për kandidatin e propozuar për transferim.
3. Kërkesa, informacioni dhe dokumentacioni bashkëlidhur kërkesës duhet të jetë e nëshkruar nga personi ose personat që kanë kompetencën për përfaqësimin e personit mbajtës license apo të kandidatit të propozuar.
4. Nëse Bordi i Komisionereve gjykon të nevojshme mund të kërkojë informacion shtesë nga i licensuari i cili duhet ta dërgoj informacionin e kërkuar brenda 8 ditëve nga marrja e njoftimit.
5. Pjesë të dokumentacionit që i licensuari kërkon të mos jenë të hapura për publikim duhet të specifikohen në kërkesën për transferim së bashku me arsyet e mos bërjes publike të tyre.

Neni 8

Shqyrtimi i kërkesës

1. Fillimi i shqyrtimit të kërkesës do të nis pas marrjes së vendimit nga Bordi i Komisionerëve për fillimin ose jo të procedurave të shqyrtimit sipas Rregullave të Praktikës dhe Procedurave të ERE-s.

Neni 9

Verifikimi i dokumentacionit dhe Informacioni shtesë

1. Bordi i Komisionerëve mund të ngarkojë një ose më shumë persona për verifikimin e vërtetësisë së të dhënave të paraqitura nga i licensuari duke bërë inspektimin në vend.

Neni 10

Afati i Shqyrtimit të kërkesës

1. Shqyrtimit i kërkesës për transferim do të bëhet brenda 45 ditëve nga marrja e vendimit për fillimin e procedurave të shqyrtimit.
2. Në rast se dokumentacioni nuk është dërguar konform nenit 7, por është marrë vendim për fillimin e procedurave të shqyrtimit, afati i përcaktuar në pikën 1, të këtij neni do të filloj nga dita e paraqitjes së plotë të dokumentacionit të kërkuar nga ERE. Nëse pas marrjes së vendimit informacioni nuk dërgohet brenda 2 muajve atëherë vendimi për fillimin e procedurave e humbet fuqinë juridike dhe i licensuari do të paraqes një kërkesë të re në ERE.
3. Në rastin e transferimit të asetëve nga shoqëria e transmetimit, shpërndarjes dhe prodhimit të nergjise elektrike nga centralet me kapacitet më të madh se 10 MË, afati i përcaktuar në pikën 1 të këtij neni është 90 ditë.

Neni 11

Parimet për miratimin e kërkesës për transferim

1. Pas skadimit të afatit të përcaktuar në nenin 7 të kësaj rregullore Bordi i Komisionerëve do të marrë vendim për miratimin ose refuzimin e kërkesës për transferim duke e bazuar vendimin e tij në parimet dhe kriteret si më poshtë:
 - a. Dëmtimi i interesave publike nga transferimi
 - b. Gadishmeria e personit tek i cili është propozuar të bëhet transferimi për të vazhduar veprimtarinë e licensuar pas kryerjes së transferimit
 - c. Ndikimi i transferimit në gjendjen financiare të të licensuarit si dhe të personit të propozuar për ndryshim.

(mban në të njëjtën nivel, përmirëson apo përkeqson gjendjen financiare).

- d. Ndikimi i transferimit në përmirësimin e cilësisë së shërbimit të aktivitetit të licensuar.
- e. Ndikimi i transferimit në tarifatat e shërbimit për klientet tarifore dhe ndikimi në përfitimet për ata.
- f. Ndikimi i transferimit në konkurrencën e pjesëmarrësve të tregut
- g. Ndikimi i transferimit në ekonominë e komunitetit në rastin e kompanive publike.
- h. Mundësia financiare dhe teknike e personit të propozuar për transferim, për të vazhduar operimin e aseteve dhe kryerjen e riparimeve të tyre nëse janë të nevojshme.
- i. Mundësinë e personit të propozuar për transferim për të mbuluar efektin financiar në rritjen e tarifave që mund të shkaktohet nga transferimi i aseteve.

Neni 12

Njoftimi për Vendimin

1. Në përfundim të procedurës për transferim aset, brenda 5 ditëve ERE do të njoftojë të licensuarin mbi vendimin e Bordit të Komisionerëve si dhe do t'i dërgojë atij një kopje të vendimit.
2. Vendimit i Bordit të Komisionerëve për kërkesën për transferim asetesh do të publikohet në Fletoren Zyrtare.

Neni 13

Ankimi gjyqësor

Kundër Vendimit të Bordit të Komisionerëve për transferim asetesh, i licensuari mund të bëjë ankimin në gjykatë brenda 30 ditëve nga botimi i vendimit në Fletoren Zyrtare.

PJESA E TRETË

DISPOZITA TE FUNDIT

Neni 14

Amendamente të Rregullores

Këto Rregulla janë objekt rishikimi dhe ndryshimi me vendim të Bordit të Komisionerëve të ERE-s, në përputhje me Rregullat e Praktikës dhe Proçedurave të ERE-s.

Neni 15

Hyrja në Fuqi

Kjo Rregullore hyn në fuqi menjehere dhe botohet në Fletoren Zyrtare të Republikës së Shqipërisë.